

# Minister Dowers: 2016 tabata un aña cu hopi reto

**ORANJESTAD - Aña 2016 tabata un aña caminda cu por a mira hopi reto. Minister di husticia, mr. Arthur Dowers ta contento y a gradici pa tur e ocasion e cuerponan y esunnan cu ta traha den husticia y specialmente comunidad den su totalidad cu a coopera cu husticia pa por a solucioná casonan cu tabata tin.**

A pone un accento hopi grandi riba e aspecto di prevencion. Por a mira cu e programanan cu a bin cu ne, diferente gruponan di what-sapp cu a lanta, a duna bon resultado pa prevencion di crimen y detencion di hendenan cu sea a comete crimen of tabata tin intencion di comete crimen.

Tabata tin cierto medidanan, pa loke ta binimento di hen-

denan na nos pais, cu tabata tin henter e fenomeno di hendenan cu tabata bende cartanan di garantía cu ta facilita hendenan cu no tabata tin nada di bin busca pa yega Aruba. A tuma medida contra esey y tabata tin un resultado positivo. Cierta fechorianan cu tabata tuma luga a reduci. Tabata tin hopi hende cu tabata envolvi pa loke ta e parti di atraco y otro tipo di crimen.

Minister ta sigui bisa cu ta lamentablemente a registra un cantidad halto di crimen contra bida di hende. Sinembargo mayoría di hende a wordo deteni pa esaki of ta den proceso cu nan ta bay wordo deteni. Por a mira cu castigonan hopi pisa a wordo pidi y a cay tambe. Por a mira di un caso caminda cu 18 aña di castigo a cay pa un persona y den un otro caso a mira ca-

mindu cu ministerio publico a pidi 22 aña. Esey ta un cos cu segun minister Dowers masha hopi aña no a scucha di esey den pais Aruba pasobra a mira simplemente un cambio den e mentalidad di cierto hobennan den nos pais lamentablemente y cu a yega asina leu pa pidi asina hopi aña pa un hende.

Tambe a reforsa hopi fuerte nos Warda costa hunto cu polis marítimo. Awor aki a logra cubri 24 ora pa dia nos fronteranan cu personal presente. Ta keda un reto hopi grandi. Tin e radarnan tambe cu ta funcionando, pero e ta keda un reto grandi.

Minister Dowers a splica cu tin full un plan pa 2017 pa bay dilanti. Tabata tin e ultimo cuater añanan te cu 2017 y awor padilanti tin un otro plan caminda cu tin dife-



rente aspecto ta keda central. Logicamente atendiendo cu crimen organisa y crimennan cu impacto halto riba comunidad manera atraco y matamento di hende. Pero un parti importante tambe ta cu kier haci mas na loke ta frontera. Kier bin cu e ESTA caminda cu por bay screen di antemano ora hende ta yega bo pais y ta tene nan pafo. Kier bin tambe cu e posibilidad pa haci mas ainda na loke ta e aspecto di seguridad den trafico, pasobra e ta keda un di e retonan grandi.

Por corda un 7 aña pasa mas of menos cu tabata tin un situacion cu a pasa 20 accidente e tempo ey fatal y e tabata bayendo den un direccion fastioso. Den e aña ey a para tur fiesta cu tabata caba laat. Tabata tin hopi cos mes cu a bay door e aña ey pa motibo di e situacion alarmante. Awor aki por bisa cu ta satisfecho cu a mira un cambio

substancial pa loke ta situacion den trafico.

Minister di husticia kier bin tambe cu un ley nobo caminda cu kier haci posibel cu for di antemano prohibi cierto actividadnan pa tuma luga pa asina preveni cu crimennan ta tuma luga. Tambe bin cu e posibilidad pa defini cierto areanan di seguridad halto, pa asina ey actua preventivamente contra cierto gruponan. Kier bin cu e posibilidad pa cera casnan cu ta bende droga. Esaki ta frustracion di hopi hende cu tin casnan cu pa añanan ta bende droga. Asina tin diferente otro cosnan cu ta importante pa e periodo dilanti pa bin den ley pero tambe pa loke ta maneho y pa asina ey sigui contribui na aumenta seguridad, reduci risico. A tende hopi critica ultimo añanan.

Minister Dowers ta manda palabranan di feliz dianan di fiesta na henter nos comunidad di parti di no solamente e ministerio pero tur departamento cu ta traha cu husticia y ta desea tur hende un prospero aña nobo 2017 y ta conta tambe cu e sosten di tur esunnan cu a coopera cu nan den 2016 y ta spera cu nan sigui duna y demostra e confianza cu nan a demostra e aña cu a pasa y pa nan sigui conhuntamente construi na seguridad y tranquilidad di e pais aki.